



UPA 2014/135
19. marts 2014
Sara Olsvig

Kalaallit Nunaanni eqqartuussisarnermut inatsisip allangortinneqarnera pillugu Kalaallit Nunaanni inatsisip atuutsinneqalernissaanut Namminersorlutik Oqartussat oqaaseqaataat pillugu Inatsisartut aalajangiiffigisassaattut siunnersuut. (Eqqartuussiviit il.il. suliniuteqarfigineqarnerulernissaat)

(Ilaqutariinnermut Inatsisinillu Atuutsitsinnermut Naalakkersuisoq)

Najukkani eqqartuussivinni suliassat qaleriaatiinnalersimasorpasuit ikilisarneqarnissaat Inuit Ataqatigiit sivisuumik ilungersuutigisimavarput. Ilaatigut Folketingimi danskit 2014-imut aningaasanut inatsisaat akuerineqalertussangormat kimigiisernitsigut 20 mio. kr qulakkeerpagut suliassat qaleriaatiinnalersimasut ikilisarneqarnissaanut atugassat.

Taamaammat nuannaarutigaarput inatsimmik matuminnga allangortitsinikkut eqqartuussivitsigut periutsit tungaasigut suliassat qaleriaatiinnalersimasut tigussaasumik ikilisarneqarnissaat maanna aallartinneqarsinnaangussamat.

Taamaakkaluartoq siunnersuut maannatut iluseqartoq pillugu arlalinnik isumanerluuteqarpugut aappassaaneerinninnginnermi Inatsisinut Ataatsimiititaliami oqaluseritikkusutatsinnik. Pivarput suliassanik suliarinninnermut atatillugu qanittumiinnissamik tunngaveqarnerup qularnaarneqarnissaa, aamma pivarput allangortitsiniarnerup 2010-mi aqqissuusseqqinnermut tulluartaunissaa.

Eqqartuussivitsigut periutsit inuiaqatigiit nutaaliaasut sananeqaataasa pingaaruteqartut ilagaat. Nunatsinni eqqartuussivitsigut periutsit sivitsorpallaartumik kinguaattoorfiusimapput. Inuit Ataqatigiinnit piareerpugut suliassat qaleriaatiinnalersimasut, najukkanik eqqartuussivinnik iluarsartuusseqqinnerup aammalu eqqartuussivitsigut periutsinik nalinginnaasumik qaffasaanerup qularnaarlugit atuuttuulersinneqarnissaat tamaviaarutigissallugu.

Ilanngullugu oqaatigissavarput tusarniaanermi akissutit kalaallisut nutserneri kingusissorujussuakkut ataatsimiititaliamut nassiunneqarsimaneri naammaginantinninnatsigu. Suliat taama pingaaruteqartigisut pillugit su-

liaqartoqartillugu Folketingimilu ingerlateqqittussaatiillugit tuarniaanerni akissutit piaartumik kalaallisut piareersimasarnissaat pingaaruteqarpoq, soorlu aamma pingaaruteqartoq Folketingimi danskillu naalakkersuisuinit suliarineqarnerinut atatillugu tusarniaanermi akissutit Inatsisartunit aamma tiguneqartarnissaat. Soorlu immikkoortup 136-p siullermeerneqarnerani oqaatigigipput nunatta Danmarkillu akornanni taamatut suliaqartoqartillugu ataqatigiissarineruneq pisariaqartoq Inatsisartuni sulinerput pitsaanerpaaffimminiitikkumallugu.

Kissaatigaarput immikkoortoq Inatsisinut Ataatsimiititaliamut suliareqqitassanngorlugu nassiunneqassasoq.

Qujanaq.